

梅竹居遺稿


全

特 257

45

75

129



始



特

特 257
129

能勢秋水翁墓碣銘

門人能勢判事一日携其先人秋水翁行狀來謁曰人誰不懷
父某之於先君特有加焉請得先生之文不朽之顧判事弱冠
從余遊才學拔等儕今則榮達有名于一省豈非以有斯父乎
乃捃狀叙之翁本姓渡邊氏諱賴善幼字龜太郎更三圭後稱
道仙秋水其別號父稱吟右衛門母佐佐木氏天保四年十
月十日生于石見國那賀郡後野村年甫十二姑夫濱田藩醫
能勢道碩君知其非凡養爲嗣翁感之心誓不辱家聲受學岡
一堂學醫山田元春能講傷寒論元春驚曰三圭俊才後必成
大名嘉永四年赴大坂從吉益掃部修內科傍就廣瀨旭窓學
詩六年從難波立愿于備前修外科產科安政中藩更命從百
百一郎服部慶順于京津川元敬于廣島學醫術如斯十餘年
所從遊皆當世大家見翁勵精不倦悉傾其秘授之翁業已成

歸藩名聲日揚重臣山本半彌最推重焉翁感激竊期報効會幕府起征長之師藩主以幕親特當其衝翁以刀圭從軍奔命各地幕軍不利長兵來侵一藩退美作未幾王政復古泰西醫術盛行翁慨然歎曰吾可以已矣結廬于勝南郡羽仁村溪上環植梅竹扁曰梅竹居故舊勸仕每辭以病明治六年鄉黨懇請難辭遂爲鄉校教員翌年兼郡中學務取締施設得宜官知其可用欲致之廳下固辭不就開家塾曰猶興舍子弟感化鄉俗頗改十年十一月疾作翁曰吾知不起然母氏在堂醫療不可不盡遣人備前問方于難波氏明年疾益劇家人勸就治西醫翁掉頭曰治術之妙存于人漢之與洋何擇且吾修漢醫以此嗣家以此事君今舍此取彼是自欺兼欺君父也強之不聽病間引筆草身後遺策一則示家計方針又賦古詩一篇授忠孝處世之法判事時年十六泣拜曰謹領命矣翁破顏微笑不

復言賦絕命詞一絕昏瞑三日遂逝實五月一日也享年四十六葬于梅竹居側配羽淵氏生三男長名萬即判事次潤吉天次三郎爲文學士現任新潟縣中學教諭翁所著醫書若干卷童子謠一卷詩文集三卷藏于家翁爲人短軀清瘦謹嚴而忠厚勤勉超人所學醫籍之外汎窺經史居常慨世道澆季循循授子弟以忠孝之旨廢藩後懷舊主不措糾合故舊每月釀金備主家不虞名曰報恩策又善事養父母道碩君晚年患中風翁奉之流離艱難之間看護無不至及其就世哀毀過禮自此一意奉歡母氏母氏好史譚翁每誦稗史野乘以樂之自奉儉素喜博施窮困鄉俗往往迫貧壓殺產兒翁豫諭之及分娩竊投資育之鄉人悅服呼以先生不名翁善詩文任意直叙不喜彫琢算數固不經講習然心計周到無遺漏晚年與同志圖殖產創一社曰日昌翁推爲社長措置適宜業務大舉云嗚呼以

翁之才之學無所用于世坎壈終身孰不惜之況於判事乎且
聞判事幼而多病又僻鄉乏師友教養一賴于翁則其眷眷追
慕過尋常者蓋亦有故也雖然判事才學夙成不負翁所期今
爲仙臺地方裁判所長叙正五位勳四等身立而親顯翁與判
事皆可以無憾矣乃作銘曰

親維前身子維後身親子一體奚問後前翁也有志兒克繼
之翁也有學兒克述之雖曰未用吾謂之用

明治四十年二月

東宮侍講正四位勳二等 文學博士三島毅撰

門人能勢判事。一日其先人秋水翁ノ行狀ヲ携ヘ。來リ謁シテ曰ク。人誰
レカ父ヲ懷ハザランヤ。某ノ先君ニ於ケルハ。特ニ加フルアリ。請フ先
生ノ文ヲ得テ。之ヲ不朽ニセント。顧ミルニ。判事弱冠ニシテ余ニ從フ
テ遊ブ。才學等儕ヲ抜ク。今ハ則チ榮達シテ一省ニ名アリ。豈斯ノ父ア

ルヲ以テニアラズヤ。乃チ狀ニ据テ之ヲ叙ス。翁ハ本姓渡邊氏。諱ハ賴
善。幼字ハ龜太郎。三圭ト更タム。後ニ道仙ト稱ス。秋水ハ其別號ナリ。
父ハ吟右衛門ト稱シ。母ハ佐々木氏。天保四年十一月十日。石見國那賀
郡後野村ニ生ル。年甫メテ十二ニシテ。姑夫濱田藩醫能勢道碩君。其非
凡ナルヲ知り。養フテ嗣ト爲ス。翁之ヲ感ジ。心ニ家聲ヲ辱カシメサル
ヲ誓フ。學ヲ岡一堂ニ受ケ。醫ヲ山田元春ニ學ブ。能ク傷寒論ヲ講ズ。
元春驚ヒテ曰ク。三圭俊才。後必ス大名ヲ成サント。嘉永四年。大坂ニ
赴キ。吉益掃部ニ從フテ内科ヲ修サメ。傍ラ廣瀨旭窓ニ就キ詩ヲ學ブ。
六年難波立愿ニ備前ニ從フテ。外科産科ヲ修サム。安政中。藩更ラニ命
ジテ。百々一郎服部慶順ニ京師ニ。津川元敬ニ廣島ニ從ヒ。醫術ヲ學バ
シム。斯ノ如キコト十餘年。從遊スル所。皆當世ノ大家ナリ。翁ノ勵精
倦マザルヲ見テ。悉ク其秘ヲ傾ケ之ヲ授ク。翁業已ニ成リ。藩ニ歸ル。
名聲日ニ揚ガル。重臣山本半彌最モ推重ス。翁感激。竊カニ報効ヲ期ス

會マタマ幕府征長ノ師ヲ起ス。藩主幕親ヲ以テ。特ニ其衝ニ當ル。翁刀
圭ヲ以テ軍ニ從ヒ。各地ニ奔命ス。幕軍利アラズ。長兵來リ侵ス。一藩
美作ニ退ク。未タ幾クバクナラズシテ。王政復古シ。泰西醫術盛ニ行ハ
ル。翁慨然歎ジテ曰ク。吾以テ巳ムベシト。廬ヲ勝南郡羽仁村ノ溪上ニ
結ビ。梅竹ヲ環植シ。扁シテ梅竹居ト曰フ。故舊仕ヲ勸ム。毎ニ辭スル
ニ病ヲ以テス。明治六年。鄉黨懇請辭シ難ク。遂ニ鄉校教員ト爲ル。翌
年郡中學務取締ヲ兼ヌ。施設宜キヲ得ル。宜其用ユベキヲ知リ。之ヲ廳
下ニ致サント欲ス。固辭シテ就カズ。家塾ヲ開ラキ。猶與舍ト曰フ。子
弟感化シ。鄉俗頗ル改マル。十年十一月。疾作ル。翁曰ク。吾起タザルヲ
知ル。然レモ母氏堂ニ在リ。醫療ハ盡サザルヘカラズト。人ヲ備前ニ遣
ハシ。方ヲ難波氏ニ問フ。明年疾益スマス劇ナリ。家人治ニ西醫ニ就ク
ヲ勸ム。翁頭ヲ掉ツテ曰ク。治術ノ妙ハ人ニ存ス。漢ノ洋ト何ソ擇ハン
ヤ。且ツ吾漢醫ヲ修サメ。此ヲ以テ家ヲ嗣ギ。此ヲ以テ君ニ事フ。今此

ヲ舍テ彼ヲ取ルハ。是レ自ラ欺キ。兼ネテ君父ヲ欺クナリト。之ヲ強工
レモ聽カズ。病間筆ヲ引キ。身後遺策一則ヲ草シテ。家計方針ヲ示ス。又
古詩一篇ヲ賦シ。忠孝處世ノ法ヲ授ク。判事時二年十六。泣キ拜シテ曰
ク。謹ンテ命ヲ領スト。破顔微笑シテ。復タ言ハス。絶命詞一絶ヲ賦ス。
昏瞑三日。遂ニ逝ク。實ニ五月一日ナリ。享年四十六。梅竹居ノ側ニ葬ル。
配羽淵氏。三男ヲ生ム。長ヲ萬ト名ツク。即チ判事ナリ。次ハ潤吉。夭ス。
次ハ三郎。文學士ト爲ル。現ニ新瀉縣中學教諭ニ任セラル。翁著ハス所
醫書若干卷。童子謠一卷。詩文集三卷。家ニ藏ス。翁人トナリ。短軀清瘦。
謹嚴ニシテ忠厚。勤勉人ニ超工。學フ所醫籍ノ外。汎ク經史ヲ窺フ。居
常世道澆季ヲ慨シ。循々トシテ子弟ニ授クルニ忠孝ノ旨ヲ以テス。癘
藩後。舊主ヲ懷フテ措カズ。故舊ヲ糾合シ。毎月贖金シテ主家ノ不虞ニ
備ヘ。名ツケテ報恩策ト曰フ。又善ク養父母ニ事フ。道碩君晚年ニ中風
ヲ患フ。翁之ヲ流離艱難ノ間ニ奉ジ。看護至ラサルナシ。其就世ニ及ン

テ。哀毀禮ニ過グ。此レヨリ一意母氏ニ奉歡ス。母氏史譚ヲ好ム。翁毎
ネニ稗史野乘ヲ誦シテ。以テ之ヲ樂シム。自ラ奉スル儉素ニシテ。博ク
窮困ニ施スヲ喜ブ。郷俗往々ニシテ貧ニ迫リ産兒ヲ壓殺ス。翁豫カジ
メ之ヲ論トシ。分娩ニ及ンデ。竊カニ資ヲ投シテ之ヲ育ス。郷人悅服シ。
呼ブニ先生ヲ以テシテ。名イワズ。翁詩文ヲ善クス。任意直叙シテ。彫
琢ヲ喜バス。算數固ヨリ講習ヲ經ズ。然ルニ心計周到。遺漏無シ。晚年
ニ同志ト殖産ヲ圖リ。一社ヲ創シ。日昌社ト曰フ。翁推サレテ社長ト爲
ル。措置宜ニ適シ。業務大ニ舉ルト云フ。嗚呼。翁ノ才ノ學ヲ以テ。世ニ
用エル所無ク。坎壈身ヲ終ル。孰カ之ヲ惜マザラン。況ンヤ判事ニ於テ
チャ。且ツ聞ク。判事幼ニシテ多病。又僻郷師ニ乏ボシ。教養一ニ翁ニ
頼ルト。則チ其眷々追慕尋常ニ過クルモノ。蓋シ亦タ故アルナリ。然リ
ト雖モ。判事才學夙ニ成リ。翁ノ期スル所ニ負カズ。今仙臺地方裁判所
長ト爲リ。正五位勳四等ニ叙セラル。身立ツテ而シテ親顯ハル。翁ト判

事ト。皆以テ憾無カルベシ。乃チ銘ヲ作ツテ曰ク。

親ハ維レ前身。子ハ維レ後身。親子一體。奚ゾ後前ヲ問ハン。翁也志
有リ。兒能ク之ヲ繼グ。翁也學アリ。兒克ク之ヲ述ブ。未ダ用キズト
曰フト雖モ。吾ハ之ヲ用キタリト謂フ。

附 錄

能勢孺人羽淵氏墓銘

孺人諱知加子舊濱田藩醫羽淵玄仲女母能勢氏弘化二年
生既長嫁同藩醫能勢道仙慶應中征長之役藩兵不利舉藩
遷美作孺人從夫於顛沛之間內助不少年三十三喪夫寡居
守節家道不饒躬執薪水裁縫耕耨之勞備嘗艱苦以育三兒
仲潤吉殤伯萬叔三郎相繼遊學皆能勉勵成業萬現仙臺地
方裁判所長三郎熊谷中學校教諭並有賢名於是游優弄諸
孫以送老明治四十四年二月六日病歿享年六十七歸葬美

作士夫墓側孺人性重厚寡言而温良純朴平生奉宗教不迷
不侮能得其旨云銘曰

無斯貞母 斯子弗勉 無斯賢子 斯母弗顯 母子相須
成此雙善 銘垂後昆 家庭標準

東宮侍講 從二位勳二等 文學博士三島毅撰

孺人諱ハ知加子。舊濱田藩醫羽淵玄仲ノ女ナリ。母ハ能勢氏ナリ。弘化
二年生ル。既ニ長ジテ。同藩醫能勢道仙ニ嫁ス。慶應中。征長ノ役。藩兵
利アラズ。舉藩美作ニ退ク。孺人夫ニ顛沛ノ間ニ從フテ。内助少カラズ。
年三十二ニシテ夫ヲ喪ヒ。寡居節ヲ守ル。家道饒タカナラズ。躬ラ薪水
裁縫耕耨ノ勞ヲ執リ。備サニ難苦ヲ嘗メ。以テ三兒ヲ育ス。仲潤吉。殤
ス。伯萬。叔三郎。相繼イデ遊學。皆能ク勉勵業ヲ成ス。萬ハ現ニ仙臺地
方裁判所長ニシテ。三郎ハ熊谷中學校教諭タリ。並ビニ賢名アリ。是ニ
於テ游優諸孫ヲ弄シ。以テ老ヲ授クル。明治四十四年三月六日病歿ス。

享年六十七ナリ。美作亡夫ノ墓側ニ歸葬ス。孺人性重厚寡言ニシテ。温
良純朴。平生宗教ヲ奉ジ。迷ハズ侮ラズ。能ク其旨ヲ得ルト云フ。銘ニ
曰ク。

斯ノ貞母無ケレバ。斯ノ子勉メズ。斯ノ賢子無ケレバ。斯ノ母顯ハレ
ズ。母子相須チテ。此ノ雙善ヲ成ス。銘シテ後昆ニ垂ル。家庭ノ標準。

梅竹居遺稿

男三 萬 同校

元旦

多少悲歡彼一時東風依舊到茅茨
早梅綻處鶯聲穩殘雪融邊柳色滋
狂態徒存千里志新正贏得幾篇詩
晚來客去小窓下無限春愁付酒卮

客中元旦 京遊中之作

漫遊久絕世途塵佳節安然好養真
爐畔裁詩聊送歲窓前無酒也迎春
紅霞一抹晴山上黃鳥幾聲吟
夢晨別是書生閒日月不同門外盛儀人

客舍歲晚

憶昔成童初志醫遠期先哲是吾師
半生游跡多汗漫滿腹感懷徒倍蓰
故國雁魚腸斷夜旅窓風雪歲除時
燈前自省愧將

死未免當年黃口兒

次掘士德哭吉益梅癡君之韻亦志悲也

悲鴻忽寄悼亡篇忍見說君歸九淵曾抱英資提後進應振餘
烈亞先賢十年螢雪徒春夢一樹白楊籠暮煙燈前半夜揮淚
讀滿窓風雨正蕭然

和鳩窓百百先生見示高韻却呈

避世市中漫業醫多年韜晦學書癡半牕梧竹翠侵席幾圍杏
桃花滿枝問字時携子雲酒談經應下仲舒帷謝君時托孤鴻
去餘教爲傳天一涯一二或作避世金門姑學痴多年韜晦善醫醫

送福島愚夫歸鄉藝遊中之作愚夫黃備之舊知一二故及

客身何事太匆忙昨別黃薇今藝陽愧我萍跡未安地羨君衣
錦早歸鄉論文探句交三月狂酒顛花夢一場去矣江山秋色
好吟身到處愜微涼

秋雨有感分韻得平字同上

檐滴聲中秋暗生蕭條物候客魂驚劍書久結飄零夢風月徒
添疎懶名空抱赤心酬國志豈忘白髮倚門情滿胸慷慨無由
洩頻擊唾壺鳴不平

遊巖島同上

清廟巍巍對海濱煙嵐一帶曉光新街頭仙鹿馴求食屋上老
猿工弄人決策英雄殪梟賊尋春聖主賽明神不須懷古惱心
緒且坐楓亭飽酌醇楓亭島中之絕勝時夏秋之交翠光如滴

冬夜

六出空中舞飄飄似絮輕晚來猛飈死一庭夜色晴眼界渾銀
樹太空唯月明窓白松無影禽噪竹有聲此際樂幽獨吾詩吾
自評芳茶屢喫盡復碎堅冰烹

冬曉

雪壓書樓曉氣白夢會幽人倚窓紗欲折竹聲時戛戛漸淡月影尚斜斜此時虛心清如水盥漱焚香讀南華

甲寅歲自夏至冬變災荐至有感賦

鼈足鍊石今何在
天柱地軸將傾欹
黃埃漲空天日黑
山嶽震動且不支
獸蹄鳥翼猶不免
飛而還落蹶而馳
老穉倉黃相携去
葉葉舟中逃海湄
天道是耶將非耶
何事慘毒至於茲
洪浪一夜滔天至
一瞬蕩盡無子遺
我聞妖邪不勝德
天變畢竟有休期
君不見別有巨猾逞猖獗
不知一掃是何時

留別仙臺原玄了京遊中之作

君生東海我西鄙
多少江山路幾千
一朝相逢如舊識
知是前身有宿緣
謾評得失嘆時事
細論今古絕韋編
金玉不秘驅豎術
賓主何論沽酒錢
東山追隨春已老
一聲促歸新杜鵑
休言啼血獨屬彼
我亦血淚洒離筵
臨別慙慙向君約
訪筇唯祈期

不愆深夜語盡情不盡梧竹窓外雨蕭然

秋夜宿山寺

殘月戀高樹蒼茫夜色賒也試吟杖去認來
梵王家清潭水一碧竹外路三叉
佛燈小如豆僧影淡牕紗欹枕聽松籟
秉燭看秋花多少清賞味總屬一瓶茶

寄墟士德士德尼崎醫官與余同學大坂吉益備前難波兩師

別來音容兩茫茫離恨恰與春恨長
瞻望徒極千里目相思屢斷九迴腸
憶昔同窓研磨日與君討論學扁倉
交情日深欺膠漆花晨月夕共吟觴
妄期一飲上池水洞視人牆之一方
當時豪氣今消鑠愧我放言屬荒唐
綢繆屈指既十歲多少游跡夢一場
雲離霧散豈有定物換星移太匆忙
樗齋先生下世後匆匆已已經七星
霜近聞黃薇老夫子奄乘白雲遊帝鄉
人海風波真可駭獨嘆往事坐悲涼
心緒如麻向誰語悵然舉頭仰彼蒼

已見近年疫魔暴猛毒傷人真虎狼又聞蠻夷漸滑夏驕恣猖
獷頗如狂知君技術兼韜略膺懲濟壽定有方試倩管城遙相
問願念舊交傾智囊

月夜過山寺分韻得寺字

寥寥半夜時吟步過山寺聚散雲無心徘徊月有意佛燈殘一
雙松子落三四磬韻尚分明老僧知未睡

除夜

歲除今夕促百事與心違把酒錢殘臘回頭嘆昨非多年徒蠖
屈何日竟鵬飛耿耿夢難就鐘聲到曉扉

讀溫疫論

立論尤卓然創見超前賢四損兼權正十傳分後先捨痾時救
弊辨氣最通玄休道論非古吾期解倒懸

遊鶴滿寺

暖日朋三五探幽古寺門僧眠花下榻鶯轉院前園野馬迷沈
水櫻雲垂壓軒正看塵外趣自是別乾坤

春日江樓送友人

歌罷陽關三疊後黯然分手下江樓幾回停立遙瞻望一路春
風送別愁

次百百先生見示韻奉謝

終年兀兀一研醫麗澤無人奈我癡賓雁忽傳規訓至一朝僻
境得餘師

送別

詠花吟雨夢空移又向秋風嘆別離別後客牕回首望各天明
月照相思

月夜泛舟分韻得清

驟雨晴來夜色清扁舟乘興洗餘醒高聲諷詠蒹葭際一櫂涼

風載月行

竹窓夜話圖分韻得痴

漫談今古信狂癡一笑陶然姑解頤知是前峰月初上半窓風竹影參差

客中元日

不知身是客天涯一醉春風似在家更有幽人尤適意新鶯併占早梅花

謁北野營廟二首

清廟巍然北野中文明千歲照西東即今神意應無憾筑海波濤紫嶺風曙色蒼茫廟樹青竇人早已帶殘星此行不恨樵花後馥郁清風德是馨

夏夜偶成

夜色晴來小雨餘一聲諷詠仰清虛千金此際亦難換滿袖涼風月上初

寄懷鄉友

儻得破牕是我居清談無友食無魚故人幽趣君看取耿耿殘燈夜讀書

秋晚屬目

斜照漸收天欲昏幾多節物幾消魂一行寒雁悲鳴去滿眼秋風落葉村

吉益樗齋先生小祥忌辰謹賦二絕

看花聽鳥轉悽然枉把憂心付睡眠一夜山房懷舊夢遙迷浪速墓門邊

泣仰蒼穹夕日微招魂一曲淚霑衣白雲似解愁人恨直和香煙東向飛

同上七周忌辰遙薦乾海苔

又遇忌辰暗斷魂潛然追遠薦蘋蘩會游回首渾如夢衣上空
餘舊淚痕

渡播磨洋

雄風吹起一帆高乍現山巒乍欲逃十八里程蒼海上悠然流
目看奔濤

留別

男子別離期刮目曾嘲涕淚似童兒今吾將渡澗江去自咲雄
心亂若絲

藝路

備路稍過初藝路長程秋老夕陽間回看已遠金川友前望未
看鄉國山

題鳴立澤圖

蕭蕭寒水看將涸驚鳥忽飛蘆荻邊笠影依稀難認得秋風一
路暮村煙

次墟士德見寄之韻四首

刀圭間却橘方黃靜弄秋光步夕陽不是登高避災客一瓢携
去換茱囊 重陽戲作

愛着黃花傲曉霜郊時賞飲醉秋光不妨人目爲長夜自詠花
顛與酒狂 九月十日卽事

天朗秋陽背可烘行吟南北又西東醉人幾隊喧狂笑知是村
醪祝歲豐 秋郊矚目

名人筆尖寫秋芳墨色巧兼幽致長彭澤先生今尚在南窓得
意喚壺觴 大雅堂菊花畫軸

酬海南所寄之作

一別已經年半回新詩忽托故人來聞君平日刀圭學化作卽

今輶略才

先考七年忌辰適在客舍詩以記志

清香一炷淚漣然泣拜鄉天立暮煙遺訓即今猶在耳錦衣何日對重泉

秋夜山寺

愛着秋光行不停蔦蘿深處宿禪扃半輪斜月淨窓下一夜泉聲帶夢聽

復瀧川道一書

辱惠書達自吉益主稅君如尊諭居諸匆匆既經幾多星霜矣豈圖復有鯉腹之命數四感讀卷而復舒別后之情趣纖悉懇到無復餘蘊因得審足下歷歲周流之鍊磨及當今鴻業之快事可賀可賀聞足下往歲淪落之際漫遊諸州出入諸家甘苦備嘗剛柔齊啖加旃再入于吉塾旁學花氏之癘科延至代尊

叔開業於浪花改行勵志軒岐是任膏油繼晷嗚呼傭庵所謂窘急勞動所發翱翔周流所得足下一一踐之行之其成立想當阿蒙不啻也矣是僕所以晨夕刮目而俟也然則昔日花柳之一醉只是男兒放膽之所爲可付諸一場笑資也耳僕何長謹之爲僕自昔辭浪速歸途又卻筴於黃薇羈寓殆可二歲一旦歸于桑梓而省二親然而橋柱題言尚未遂數卷丹書一七藥石未足以振先師之餘烈門外之雀羅藥籠蛛網乃取嘲於市朝而已矣若夫所謂畫錦之榮者果何在哉是僅所以憤然不安再三叩名流門戶也足下傳聞之虛譽僕何敢當頗覺赧汗流溢耳諭云昔年足下途上傳語于堀子德之一事僕在備之日委曲承之厚謝諸特至其托花章於松尾修亭之事僕斷斷不與聞焉請莫致咎於報書嗚呼先師仙遊之後海內群友雲離霧散音容兩茫茫思慕無極且未嘗聞有一人着先鞭者

僕固庸劣唯有宿昔一片客氣未全滅却耳足下以爲何如時
是殘災漸銷新涼始至爲道努力萬萬是祈不悉

副啓

賜書行文筆鋒雄健其利過于干莫佳什願示焉僕依舊碌碌
近作兩三詩併呈請痛斧却說僕備遊以還出彼入是今又學
于百百老師之門論說覺漸漸換舊面且風月之雅談亦爲不
少少都期渙水一下之日而吐露了

偶感十五首次 綠竹山公韻

偏性愛幽致卜居隴卧東臘梅當曉戶快雪舞朝風秃筆漫言
志拙文聊送窮迎新從此去更醉百花叢
杏林圍屋處寂莫託孤蹤藥石難醫拙園庭宜學農身同巫卜
伍心與水雲從偏感乾坤大不嫌容我慵
出入毀譽境粗豪心自降病顏駭明鏡衰髮恥寒江舊夢顛花

日新愁聽雨窓此時深悔恨天地或無雙

霰雪鳴窓戶北風徹曉吹守貧無舊債論志有新知曠達元非
願清幽聊欲追一樽須盡醉未至穢網維

十歲在京洛倦游千里歸鄉衣無着錦公服豈纏緋周顛形空
瘦卜商身未肥羞吾齊瓦礫何以發光輝

迂愚兼宦累未得伴樵漁齊國徒彈瑟淵頭漫羨魚無廉如仲
子有病似相如獨坐中懷切天心月上初

病臥三旬許床頭筆硯蕪蹉跎志半屈荏苒年空徂風穩雪初
霽日暄梅稍蘇邇來多廢事何處下工夫

寂莫衡門下連霄雨雪淒抱懷添馬齡安拙守鳩栖肘後無新
得橋頭愧舊題病軀耳蹇劣爭與古人齊

窓外數竿竹清幽添雪佳論心無俗客容膝有茅齋揮筆時抽
秃讀文偶及俳自嗤吾見小長此寄生涯

夢覺寒窓曉蕭條撥死灰坐來殘漏動何處斷猿哀空抱二毛
嘆兼羞七步才歲闌多感慨胸臆向誰開

風雪年將盡寥寥伴世塵強斟杯裏物狂換意中人形役難安
朴言多易失淳何當出此境去渡武陵津

日暄融臘雪山色入樓分縱日晴嵐氣濯纓清水紋試酌陶令
酒却對漆園文聊慰塵寰裡有閒充臥雲

陽氣初回後南軒日稍溫開樽醉泉石高枕臥乾坤守節風塵
裡遂愚醫卜門靜言念思此無一不君恩

病臥既逾月衰容併歲殘僅知茶當酒未信霞爲餐一賴趨庭
訓半經行路難靜言念思此含淚坐更闌

偷閒忙裏去裏忙自成閒一卷書娛眼三盃酒解顏馳神邱壑
際言志竹梅間僅是消憂地即吾着屐山

偶成次小出子粲韻

無復纖毫塵慮生閒聞戛戛竹林聲青燈照眼吟魂爽白雪侵
窓夜色晴一二枝梅充雅友兩三杯酒破愁城幽居偃蹇曲肱
臥不向人間說不平

前狼後虎競相生早晚當聞咆嘶聲姦賊情兼妖氛暗忠臣心
與列星晴萬民塗炭濕龍袖羣國兵車會鳳城竊喜 廟堂勞

吐握舉賢日夜畫清平

由來吾性分迂愚漫託醫流供稱呼風月消磨半生夢詩書偃
蹇一狂夫新成醲醞涵吟骨舊做緼袍護病膚人世若知金馬

趣山林何必訪仙區

衡門寂莫守吾愚日暮唯聞鳥雀呼閒散淹忘世消息踈慵徒
著睡工夫曾無奇術肉枯骨偏恐寒威砭病膚滿架斯書滿樽
酒悠然占得一寰區

俗士不知賢與愚認來形影便喧呼居身股下非癡漢失箸雷

聲豈懦夫醜美取人愆玉石驪黃相馬眩皮膚從來此意難論
世一夜燈前笑撚鬚

自註原詩落句押區字苦思一夜雖然斷數莖鬚猶未
能得終以一夜撚鬚等字搪塞了

冬夜獨坐

階前堆雪逼窮陰獨夜沈沈兀似瘖白眼姑辭名利客青燈照
見古今心一瓶茶味真知己滿耳松聲是好音怪得古人品評
偏春霄一刻價千金

歲抄書懷

獨坐蕭條敝緼袍流年偏覺減粗豪二冬文史暗雙眼半世風
塵嘆二毛滿地霜華月光苦諸街人語屐聲高通霄不寐踈燈
下多少情懷付濁醪

甲子元日

流澌無恙舊山川滿目風光稍爽然一帶煙霞呈嬌態幾株梅
柳報新年漫追芳草池塘夢兼學臥龍湖海賢竊喜天公不踈

我為將春色到窓前

賀田子精進班 次其自祝之韻

喫來世味幾酸辛一旦承恩初遇春遠志應期澤加國高才豈
止語驚人賞花宴席寵年倍論道經筵說日新更祝功成名遂
後肉為琥珀骨為銀 落句全用原詩

春日草堂吟五首

草堂春色好小雨偶晴時桃李花如約園庭日可窺鶯聲繞檐
近柳色入窓滋此際詩人業晨昏漫撚髭

草堂春色好把酒遣閒愁紅霧窓前榻翠煙雨後樓鳥遷喬木
轉魚認落花浮借問賞芳者幽情似我不

草堂春色好淡淡日昇初新翠映階滴閑花園屋踈灌園栽樹
竹掃室對琴書寂莫曲肱臥偏憐塵慮虛

草堂春色好乘興步庭間搖曳池頭柳氤氳雨後山支筇聽啼

鳥對酒破愁顏一醉明窓下占來幾日閒

草堂春色好日暖惠風和狂蝶追花舞騷人載酒過山當窓外
秀煙傍柳邊多俯仰此中越堪稱安樂窩

歲抄臥病

連朝雨雪故人稀閒養病軀肩竹扉近日懶加前日懶今年非
似去年非二餐猶幸飽粗菜一醉何勞典敝衣即是吾輩得意
境人間未必問輕肥

次子粲歲勉書懷之韵

四方紛擾幾春秋戎事倥傯歲月流囊底元無藥醫國人間豈
有地埋憂窮通偏付塞翁馬功業何勞戚甯牛獨臥窓前夢難
就踈燈寒枕夜悠悠

朝聞夕視幾酸辛世事紛紜天欲春十歲言論總糟粕一生志
願半灰塵踈慵未免素餐伍迂拙偏羞小技人竊感東君化功

速早梅踈柳已呈新

悠悠減却半生涯復掃艸堂迎韶華滿目浮埃窓戶古三閭破
屋瓦檐斜風塵寥落樵漁伴雨雪蕭條醫卜家唯有幽人賞春
設一瓶插得早梅花

送阿部某凱旋于江戶

歸程遙指武昌城二月春風旅服輕多日雄談兵戎事連宵痛
飲凱歌情山山佳樹啼鶯曉處處春風征馬聲憐汝猶留餘勇
在江山萬里任橫行

偶成次子粲韵

脅笑從來非所堪悠悠世路又難諳踈狂唯護煙霞病清苦猶
貪文字耽幽徑花開步新月閑窓日暖坐晴嵐若教身世能如
意諷咏騎驢入劍南

客絕柴門鎖綠苔悠然掃去枕床埃倦禽不語閑花落殘漏無

聲微雨來夢裏煙嵐興鬱勃眼中邱壑神徘徊請看一寸階前地亦是吾輩百尺臺

醉歌二首

輿論喋喋日縱橫一木難支大厦傾義勇徒歸亂賊黨姦雄巧弄勤王名幾條衣帶廟中策數片蠻帆城下盟沈思半宵何所聽狂風急雪打窓聲

聽盡狂風急雪聲劇談痛飲夜三更觀來海內尊王者多是中原爭鹿情群議因循能護位孤忠慷慨或傷生工夫須向此中着泰岳鴻毛有重輕

自嘲

病懶蕭條既半生三冬姑對一燈檠有窮身發無窮感得意詩言失意情小技從來列巫卜微軀豈耐防胡兵自嘲邦國多難日添得人間長物名

冬日寄懷羽淵桃塢在浪華

知君書劍自飄然處處豪遊興可憐汗漫且探河攝路聞生有河泉之行優游賦得水雲篇一樽意氣高臺雪高津望雪滿坐風流牡蠣船廣陵之却笑吾輩身世冷風塵病裏送殘年

同上

燈前裁去一封書任筆殷勤問起居兼問方今國家事中原論說近何如

對梅花獨酌

漫對梅花醉幾回寒光寂莫入杯來不妨門外多風雪一領綈袍護散才

冬至小集賦示諸友

凍雪黯澹未放晴結未風雪之伏線不可吟行探梅花故至日聊尋同社盟聊招飲方偃技之諸友蹇猶憐早梅色一陽微萌當日光景衰殘轉見故人情平生交態淡如水至衰殘寥落之時始覺情好之切

蓋暗反於黃金不多交不深之意一聯同氣相應同類相憐之意而一点意氣尚存處百年苦樂半樽酒日苦日樂得失所判而其

得只是不過僅終世浮沈一匙名日浮日沈榮辱所關而其榮亦止瑣瑣方

慨之所由生痛飲今宵須醉倒唐詩酌酒與君君自寬人情翻覆似波瀾予所見亦如此門前風雪不

堪行呼應第一句不啻行路風雪之艱難世途人情亦太艱難通篇錯綜無限憔悴無限感慨不着一点虛飾真吾輩之語

慶應紀元乙丑臘月二日曉天儲君生 臣適宿直 有詩紀喜

瑞氣祥雲曉色新乾坤別闢一場春熊羆坐卜前宵夢弧矢恰逢上直辰已覺威望鎮社稷更期膏澤加民人微臣辱在醫員未長奉恩光立後塵

乙丑歲抄書懷

三十餘年心事空不堪歲月謾匆匆時危內患外憂際人老醉生夢死中病影蕭條杯酒冷流光荏苒路途窮痴兒未解初寒苦擲雪打冰呼北風

同上次子粲韵

功名富貴復何期人事天心自有涯一榻長容寒士膝敝袍護得野人姿已占窓竹瓶梅色未缺豆羹簞食貴狂態任佗窮鬼笑通宵撚斷數莖髭

丙寅新正臥病五首

新正臥病廢朝參紅日三竿睡尚酣笑殺夢魂獨強健也尋梅柳到溪南

東風一陣到茅茨短柳疎梅豈我私始識心閑病亦間木綿衾裡睡多時

衰病疎慵互去來床頭筆硯委塵埃唯將藥物充杯酒未有詩情到柳梅

隣境警聞未弛兵新年風色不分明病軀唯喜足閑意安臥覆衾聽鳥聲

兵甲頻年時不平春來花鳥尚關情
慙慙寄語縱橫士莫爲功名誤聖明

代知新次香取氏元旦之韻

東風無恙到山隈僻地韶光亦雅哉
懶睡占來閑日月望春攀得舊樓臺
數聲鶯傍檐端囀一樹梅當籬角開
此際況逢家釀熟微醺日適函三杯

神代村寓居雜詠 丙寅

身生恰若不維舟流寓忽經一葛裘
姑典敝衣換村釀未售短劍買耕牛
膽薪竟負復讐志桂玉徒勞鋤口謀
醉夢驚回推枕望雪聲燈影夜悠悠
雪聲燈影夜悠悠坐覺寒威襲枕頭
壯志全兼死灰滅浪蹤恰似片雲浮
更無圖籍供閑覽徒有妻兒伴暗愁
昨遇故人約明夕能侵泥路訪來不

說楚論秦物議紛中原多事不堪聞
殊恩幸賜養愚地閑以刀圭供臥雲

雪滿林塘晴色分窓前一酌坐微醺
近來自覺疎慵長搗藥鍊丹勞細君

龍門一躍上青雲當路諸賢才不群
堪笑山村一迂拙訪病售藥走斜曛

三冬避亂臥山陬暮雪朝雲奈客愁
一夜鄰人來報道姦民結黨迫城頭

臘月初旬津山城頭細民結黨強訴

深覆衾裯撥死灰防寒村釀兩三盃
一聲剝啄知何者里正殷勤警夜來

里正平左來

年盡甲兵恹惚中孤衾寂寞臥林叢
痴兒未解祁寒苦擲雪打水呼北風

一敗偷生罪已深縱逢嚴譴固甘心
豈圖近有慰勞命牽及吾

徒尚賜金

賜白銀三枚

村居忽過十旬餘日覺村居與世疎故舊近來消息少松江風色定何如

松江風色日冥濛備盡故人書一封怪得松江風色惡投翰咄咄欲書空

閱來三十四春秋胸裏唯添多少憂散步獨臨碧流立天時人事水悠悠

數里省親叩竹扉膝前小酌野鷄肥幾聲水碓桑村夕餘醉高吟寒月歸

臘月十六日到打穴村侵夜歸

豆羹單食適斯身斗米雖貧未太貧小技時奔村里急一囊藥石救窮民

孤蹤索莫托山村時有故人來倒樽休謂貧厨兼味少一盤芹菜亦君恩

臘殘天氣日晴暗閑喫煙茶坐小軒童子不堪春意動紙寫竹馬至黃昏

臘殘天氣日晴暗省病經過村又村今日一行何所得南塘梅樹稍還魂

臘殘天氣日晴暗微恙貪閑不出門偶有親朋來覺夢野鷄山肉倒瓢樽

伯亨沈卿來酌

竹製花瓶形太奇自誇粗朴適茆茨歲寒未有一花發先插南天紅玉枝

花瓶自製也南天燭此地名產

孤蹤落魄寓田園二徑何論松菊存唯有一條悲憤在寒雲歸鳥亦消魂

心事伶俜兵燹餘衣冠翰墨拂函虛軍勞賴有片金賜購得一編詩韻書

含英價一方金餘

纔降山頂又深溪樵徑幾條路欲迷我自窮途狂阮籍即今不

特失東西

起呵凍硯寫幽情自覺筆頭風味清竹韻銀光雪一尺梅魂松影月三更

閱來世路幾淒酸雨雪天涯歲又闌飲霧固難供半醉啖霞豈耐換三餐英雄誰謂隱醫卜迂拙吾知老水巒笑擲兔毫送窮鬼一燈殘影夜窓寒

門庭窓戶付荒蕪歲晚僑居一事無笑殺山妻詰朝設摘蔬沽餅理貧厨

階前埋雪又窮陰今歲窮陰感轉深函底竟餘孤劍古鬢邊看覺二毛侵千秋涕淚邦家恨半世膏盲邱壘心此意從來向誰語乾坤寥落少知音

分借茆檐數席隅厚顏聊此護妻孥莫拋炒豆追窮鬼鬼鬼今年屬我徒

欲謀一夕醉冒雪訪詩盟之子去何處酒瓢床上橫

臘月念七訪山田三省不

在見酒瓢橫床頭戲題

陶然而飲隤然醉歲盡膝前言笑中已覺床頭春意動一團和

氣自融融

立春前一日膝下小宴

丁卯元日

短柳疎梅兩慘然蕭條物候入新年緼袍一領斂襟坐泣拜松江萬里天

大君雲邸小君因淚墮深宮幾艱辛偏畏恩光厚微物鷓鴣先息一枝春

甘分鳩居此一時春風也試拊花卮醉來漫被幼兒誘請得南鄰梅數枝

新正阿部子祥來訪

梅未放香鶯未鳴田家何以慰幽情忽逢朋自遠方到聽得新

春第一聲

別後風煙幾變更相逢先見淚縱橫
半生懷抱千秋恨枉付春
窓酒一觥

偶然相值舊同盟直說明朝就路程
濁酒菜羹急謀婦一燈話
盡數年情

里山隱居被惠梅花一枝賦謝

暗香素影不堪清珍重分來付賤生
直把床頭半瓢酒酌君割
愛一枝情

新春岡子淨來訪

濁酒留賓扁草堂春陰淡淡日初長
俱憐百丈紅塵外護得瓶
梅一朶香

相逢先勸兩三觴話古談新分半床
一夜草堂春醉夢暫遊故
國舊池塘

身跡蕭條天一方衰殘非復舊時狂
憐君慷慨留餘勇揮淚燈
前說戰場

子淨分袂其日偶雪

六出花飛似絮翻滿眸霽色落黃昏
知君今夜留筇地應是栽
梅賣酒村

滿天飛雪暗春衢此際故人復上途
素影暗香泥土裡不知何
處得林逋

松墩竹塢雪皚皚何事吟朋棄我回
寒枕孤燈獨夜夢見君曲
笠度崔嵬

春興八首次田子精韵

李白桃紅春色奢暄風一路酒帘斜
和鳴欣轉山山鳥醉倒狂
歌處處家泉石還粧舊嬌態村閭姑
占小繁華誰知此際愁人
淚濺盡窓前幾樹花

多少悲酸彼一時東風無恙向顏吹新來燕認舊巢息僅倦鳥
追芳樹移萬里陸沈人稍老半霄燈下夢空隨三春事業真堪
笑數斗村醪數首詩

富貴功名一片塵浪蹤托去不論鄰探花士雜談農客垂釣侶
從請藥人破屋荒園元適分溫袍濁酒未全貧即今殊覺君恩
渥幾首放吟猶弄春

偶然又對幾芳葩獨坐閑房感歲華纔結池塘春草夢忽看桃
李杏櫻花半窓梧竹漸遮眼滿徑蓬蒿自護家清苦猶憐清趣
在睡餘未缺一瓶茶

百茶開落奈愁何一片雄心老薜蘿客乏親知樂事少詩流感
慨怨情多門前水送春光去林外禽呼鄉夢過睡起窓頭一樽
酒愴然依例對山河

吟筇游屐一身輕又向春風着酒名憤懣難追踏海志清狂在

寄浴沂情尋花時念新詩去採藥兼探奇景行獨喜紅塵滿眸
裡可憐色屬可憐生

花飛鳥倦綠陰初吟杖詩瓢逐日疎白屋三間暫容膝青囊一
帙未藏書魂消他境新風月夢繞故山舊草廬憔悴自嗤減酒
量時呼鄰叟盡殘餘

衣上空餘舊淚痕天涯流落托田園謾追狂蝶步幽徑時聽鳴
禽坐小軒滿目青山媚煙靄一叢綠竹長兒孫靜觀物理醉且
睡深見天公雨露恩

三苟樓新成蓋我 公游息養病處也

恭賦二律應 命

卜得閑鄉百尺樓喜君高臥自優游山光蒼明當檐秀水韻潺
湲繞澗流千頃晴嵐秋綠漲一村甘雨爨煙稠登臨俯仰幸聊
慰何物沈疴不可瘳

八風占盡一高樓避暑聊斯供臥遊新月半輪破雲洩殘螢數
點傍江流侍臣顏奉溫顏喜庭樹露兼恩露稠調護元來貴舒
暢尊癩從是永全瘳

和歌題同諸子咏

山寺尋春春已老閑雲漠漠夕陽春僧徒不管花落盡撞破殘
櫻樹下鐘

曾訪沈卿之隱居戲賦一絕云決然勇退臥林叢滿目
風塵一掃空唯有姓名不掩得人稱當日美髯公方今

沈卿果有復官之命故疊前韻賀之聊供一粲云
決然應辟起林叢豪氣復將凌太空管見一詩終不誤雄名果
震美髯公

六月十七日有懷戰死諸士

孤栖纔守會稽山往事回頭淚自潛鏖戰一場吾策屈陰謀十

歲敵情姦淒風吹骨骨空朽愁雨招魂魂不還良計誰除薪膽
苦何時能解越王顏

同日有憶山本知新

四十年間事亦煩臨危授命答君恩半生枉屈高翔志一死奚
疑素定魂傲骨縱同土石朽英名永與邦家存追懷一夜愁眠
夢恍見當時舊貌言

賀小出子粲致仕

吾子心不屈於屈公上恩伸於不伸屈伸有命我不問我賀吾
子全性真山峩峩水洋洋矣義皇趣屬義皇人

九日登高同羽淵山田二友陪木下文庵之宴賦謝

占得松林醉一場晴暄偏喜屬重陽厚情分賜公厨饌豪興競
寄同社狂千古風流黃菊酒百般勝槩白雲鄉能將妙術醫憂
苦此是先生肘後方

疊前韻示二友

落魄消魂幾許場強扶憔悴醉重陽風流既結樵蘇會意氣猶
餘詩酒狂青眼黃花喜親識白蘋紅蓼說家鄉交游隨處隨時
在不學仙寰避穀方

贈故人

鏖戰幾場魂魄驚纔扶餘喘寓柴荆故人近日情何薄不向雲
邊問死生

送木下文庵歸國

雲山萬里飄零身猶喜交游僅得人論極扁倉尋古道興吟風
月樂天真寒鴻落木歡情老暗燭殘盃別恨新唯禱清平他日
會放歌俱醉杏花春

人世歎離別此時況此君綈袍感戀戀杯酒思云云已僅謂將
謂未全聞所聞匆匆一分手望斷萬重雲

尋常離別詞應送尋常客此別異尋常投毫浮太白

萬林紅葉叱萃騮最是歸人得意秋嗟我萍踪何處定殘燈影
裡送孤愁

所見

秋老橘黃初貪閑閱韻書風霜人不到落葉滿庭除

訪山田三省小酌

偶訪故人廬故人幸有儲秋天霜落後下物煮香魚

聞小出子粲奉命入京師有此寄

十月風霜滿路程聞君奉命入京城短刀孤杖依然在斬掃許
多荆棘行

短刀孤杖及掉刀斬荆棘皆
子粲詩歌中之常語故及

次韻文庵二首

半瓢枉換一長嗟茆屋蕭條落日斜卷帙僅消殘歲月刀圭聊
寄小生涯漫將客土爲吾土已自梅花至菊花秋霽時逢同侶

到貧厨傾盡酒頻賒

一身無往不悲嗟獨坐蕭蕭古榻斜滿樹秋聲嘆末路半路殘
瀝笑生涯天邊永負故山蕨籬角空看客土花愁緒紛紛向誰
語寒鴻落日與心賒

迂言一篇贈沈鄉子粲在京師

當天下至難間從天下至難事難哉嗚呼難哉難着才難憑智
勿見分外之榮勿執眼前之利勿走捷徑自顛勿哭窮途自棄
諦視大小輕重一意順承道義至誠一通神時天兮永賜爾類

戊辰

雪路頻頻叩迂拙二君情味可相憐濁醪一醉寒燈下說起關

原戰伐篇

示河島保岡二子時余
爲二子講日本外史

餘喘未兼梅氣蘇山村春色付長吁半生形影燈明滅一片功
名夢有無窓下談兵客非侶酒間按劍我嘆吾何當適我本來

分還作探芳採藥徒 元日

刀圭餬口亦難哉泥路夜深扶杖回倦臥寒衾未成睡有人遠

叩雪扉來 辛苦

地僻歲寒春意遲北風臘臘尚矜肌驛使謾傳世消息不寄江

南梅一枝 嘲驛使

傲裘古杖度嶙峋鳥意梅魂尚覺真都上風光君莫問干戈狼

藉九重春 代驛使答

癡雲日黯黯頑雨日濛濛天公亦何意似伴我癡頑 痴頑

折梅插壁間把酒對青山一息殘生在聊偷半日閑 偷閑

病起被筇扶行吟碧澗隅野梅春不管獨立護清癯 病起

泣血號天彼一時仍貧斗米護妻兒春窓望暗連朝雨日見門

前草色滋 春雨

殘生俯仰弄春和僅是吾儕獨樂窩花月煙嵐詩酒外不容人

海說風波 似客

簞食豆羹未死貧看花聽鳥也消春醉來多謝天公意不肯痴
頑迂濶人 同上

危言亂世亦狂哉迂拙唯當安草萊雲雀聲聲春已好放吟且
舉忘憂盃 同上

野禽爲友花爲鄰吟嘯安然聊占春別有匙耕奉天職聖恩暫
許一頑民 解嘲

春窓睡初足試茗坐軒端不解前途險猶貧一日安 睡起

二月念三日山田三省來酌乃相誓禁酒有詩證之

僅以一樽酒時聊換嘆嗟斯術亦窮矣投盞謝韶華

春晚偶成

心事蕭條春已深悴容看覺二毛侵空將滿眼憂時淚減向殘
芳影裏吟

受樂府君二十年忌辰志悲

落花啼鳥尚餘哀屈指星霜二十回遙憶故園兄與弟墳前語
我掃莓苔

流落天涯三閱年每逢諱日轉悽然即今蘊藻亦難薦淚付清
香一縷煙

九原難起恨綿綿空對妻兒說往年日暮鄉天望杳杳一鵲啼
度夕陽前

論醫方質寮友

擬扶化育護蒼生吾技誰言賤且輕壽域躋人賢聖績周官分
職疾瘍名細窮營衛百骸理洞察膏肓二豎情非是至誠真見
得法方何以致精成

寬猛剛柔術兩難丹書細向靜中看功期桂葛一匙未診決寸
關三指端缺藥洞腸毛髮豎快刀割骨膽肝寒許多生殺權存

手莫謂醫非司命官

識立學精才始舒由來先覺不欺余法窮素難去聲固無闕方涉
元明已有餘陳腐人嗤蠹殘字新奇我厭蟹行書漢蠻混合君
休唱圓鑿竟何方柄如

燈前溫故儘知新蠹簡數編真可親錯節盤根三折臂殘芳枯
葉再回春投機槿桔時稱帝臨變蓼著或伍臣方不尊奇不尊
衆由來巧妙自存人

偶感二首

前次主靜韵
後次如雲韵

柴扉未帶白雲扃一片冰心尚役形倦去易眠還易覺愁來宜
醉不宜醒厚顏長愧懷沙賦強舌空思道德經望暗荒村古窓
晚滿簾細雨弔零丁

客絕山村霖雨餘寂寥唯似子雲居魂消都上云云信憤洩空
中咄咄書滿徑蓬蒿看自大半窓梧竹未全舒何當能一掃雲

霧明月清風嘯太虛

藥鑪鑪畔臥梅霖寥落乾坤歲月深囊裏黃金空自盡鏡中白
髮暗相侵已醒軟翠嬌紅夢尚憶高山流水音倦去中宵倚梧
坐一燈長照古今心臥病

梅雨二首

無客叩扉檐梅霖漸覺淹窓昏煙氣濕晝靜雨聲嚴愁與草苔
長病兼蚊蚤添無聊既如此豈耐燃詩髯
雨勢傾盆至浹旬無一晴壁間新黴氣枕上亂蛙聲瘴霧侵晨
冷澗溪徹夜鳴心田當此際荒廢不堪耕

新晴

淡日微風雨偶晴便乘筇屐出柴荆插秧十日荒村路牛跡縱
橫未可行

初夏念三過油木北村歸途訪山田三省小酌有詩紀之

輕履乘晴隨意攀險途不比世途艱好音宛轉樹間鳥新翠淋漓雨後山微倦時支孤杖憩偶談姑伴老樵還幽窓更叩路傍友一醉相迎笑解顏

偶成

嵐氣翠光雨霽初滿眸風景入庭除山厨空憶氤氳酒村俎難登潑刺魚半碗新茶倦書後一盆炒豆煉丹餘貧生笑却顏皮厚漫以他廬爲我廬

俟木下文庵來

故舊愆期旬日餘晨昏消息果何如微風簾外雨晴際綠樹山中酒熟初

偶成

一犁膏雨入桑麻百事匆忙老圃家笑殺閑人新事業荒園牛卧種胡瓜

糟糠三歲護殘形纔說人間不耐聽獨有幽情擬清福綠陰煮茗讀茶經

飯上散還聚酒邊去復來尤憎午窓夢欲就卒全回憎蠅
以汝比讒佞古人言不苟百年猶一日汝黨一何多同上

雜咏

難掬西山翠難凌東海濤三年苦口腹我自愧吾饕
無意延年術不求却老方願拋擲生計滄霧療饑腸
雖屈夷齊節難伸管樂才幾場悲喜裏人自老蒿萊
屈尺恥尤大直尋焉足怡借問二三子辛苦果何爲
難購三間屋何論百尺臺與其朽草莽寧被葬龍堆
千金買馬骨往昔尚迂徊今世貴神速已登幾郭隗
復古勤 王業時賢氣自豪 君王亦多事吐握及腥臊
插秧淫雨滋簑笠日淋漓恰似三伏際夏畦汗滴時

兒時携午餉妻曰助庖厨方此田疇急先生一事無
媪說東坡菽翁談南卧禾連宵厭農話時或顧言他

醉後聽鶻

醉後窓前凭几歌亂燈明滅雨滂沱交游畢竟因病少逋債從
來爲酒多肘后青囊仍拙術腰間白又不堪磨滿胸一夕桑滄
感付與杜鵑啼血過

哭尾關太夫

慶應四年戊辰閏四月十九日
死國事於京師

擔當護得國家危一死從容不復疑業照生前感功績名連身
後見仁慈千行墮淚峴山跡百歲遺風麟閣姿慶弔交羞數言
字滿眸暝色雨如絲

哭向旻天零雨濛百年言貌望成空有威不猛大臣度母我能
容長者風憂國深謀防難策愛君專任致身功誰圖一木撐持
力護大厦來傳不窮

送主靜之任平安 七月念七日也

單刀匹馬帝王州一片雄心衝斗牛富貴何期後人樂勤劬原
是爲邦憂辨論屢近公鄉座醉放狂狂花柳樓憐爾優游占閑
夜月明三十六峯秋

酌酒勸主靜

村釀勸來三兩觥滿庭蟲語送秋聲幽窓一別與誰伴明月清
風夜夜情

六月念五訪大町生於鶴田江邊乃泛舟供酒賦謝
生客歲新娶今始相見結未故及

載得江湖舊酒盟扁舟短棹去留輕滿眸爽氣秀峯翠兩岸涼
風柔櫓聲羹膾供來魚潑刺冠纓濯去水澄清殷勤更喜新人
意已解親交醉放情

舟中口占

三年流落食無魚窮困恰如涸轍魚豈料晴山綠江底新蕪一
日醉香魚
新蕪一日醉香魚脉脉交情感水魚爭得煙波話今日飽嘗棘
鬣大紅魚

明治己巳二月念二日早發浪花訪尼藩舊友堀內伯
竹伯竹此日輕舟至于浪花適不在家淹留一夜賦詩
待其歸

早發浪花訪君日聞君舟向浪花浮從來人間不如意空坐書
窓寫旅愁

痛飲徹夜曉天分袂

偶然又叩故人門泣語十年憔悴魂一醉匆匆春夜短酒痕偏
帶淚痕繁

又

與君不相見十又二三年羨爾已藍出愧吾終瓦全激昂談若
湧痛飲酒如泉尤喜家意穆不嘲醉客顛

念三日大雨失伴侶獨行經神戶過楠公廟邊有感

做笠古筇行且歌斷碑殘傷感情多尤思淫雨蠻煙暮獨向楠
公墓畔過

衝雨過須磨

青鞋十里入平沙奈此脚疼中酒何倦去吟眸只恍惚一蓑煙
雨過須磨

京遊稿 戊辰

入京有感

不到平安已十秋重來今日思悠悠依稀纔認昔游跡鴨水橋
邊舊酒樓

次韵山本子

處處游人紅葉秋十千買酒醉高樓誰知此際無錢客說着糟
糠思故州

雪滿東山萬樹枝樓臺無處不呈奇多情最是六街晚惱殺平
安游俠兒

初冬念八訪伯亨主靜二子飲大宮街客樓

相遇懽然還愴然客中交態轉堪憐團欒半日心腸底傾盡一
樽丹釀前

二子供丹釀絕品名島臺者戲用二字爲章

醉語狂顛一笑開交情脉脉故人盃風神將直凌三島不羨人
間碧玉臺

客中歲晚

滿眸雨雪歲將除戎馬天涯倥傯餘風俗漸併文物變人情未
與柳梅舒旌旗影接鳳凰闕鼓角聲連歌吹居獨有迂生抱迂

願訪師時讀蠹殘書

閱來人世幾悲涼強以殘形客洛陽雪路叩師愁日短風窓護
病困宵長馮驩榻下漫彈鋏杜牧樽前空斷腸衰眼此間何所
慰古梅魂返傲寒光

己巳新正初四與竹塢酌於八坂社傍酒樓席上次韻

春色無看不斷腸嬌鶯樓外柳梅傍千金一擲非吾事也向尊
前說家鄉

六街艷景百般新滿眼風流不耐頻小酌閑吟暗香下一團笑
語領陽春

酒間走筆付與佳人

雨聲燈影夜沈沈醉裏相看感轉深數字屬君君記取一宵情
寄百年心

盟來盟去竟無期空向春風嘆別離縱使他年幸相會相思花

作斷腸枝

柳色如煙雨若絲江亭惜別舉盃遲無端想得漢宮恨此恨綿綿無絕期

放言次主靜韵

佯狂自笑欲真狂一醉長歌氣激揚補睡村醪薄如水抱憂身世冷於霜堪憎巨猾強凌弱不似佳人柔制剛獨有痴情未全覺夢迷鴨水舊游場

自許半生詩酒狂醉來醉去氣揚揚風流會詠六街雪疎放何妨兩鬢霜短刀未必試盤錯饑腸豈可擇柔剛至今燈影雨聲下縹緲猶勞夢幾場

次子粲韵却呈

蟲臂鼠肝何所求狂愚猶喜伴君儔粗工難治煙霞疾野性宜從麋鹿遊一夕清談新臭味半瓢酣醉舊風流與君姑闕別天地

地不識人間有寇讎

早起矚目

溪流曲曲水西東家寄荒墩斷塢中蚤起閑披陶集坐滿襟涼氣綠秧風

夏日病臥有憶伊東主靜

人海風波日夜侵鷗盟鷺約也難尋世間漫說浮雲富天下誰論古聖心四歲畏饑思樂士浹旬病渴望清陰問君鴨水涼棚夕近日果爲何等吟

送木下文庵

容吾疎放愛吾癡偏感新知似舊知雨裏衝泥夜載酒風前展卷朝談醫會無杯酌論賓主儘有文詩爭鼓旗多少交歡作陳跡荒庭蟲語欲秋時

相離相遇又相離花下追隨能幾時千古談論爲吾發百年懷

抱賴君披酒杯懇懇非無約雲水迢迢何所期一醉茫然分手後樽前空想玉山姿

和伊東主靜見寄之韵却寄

休慕家山綠樹陰家山近日日蕭森蜀魂啼血腸空斷蛇蝎侵人草轉深水瘦香魚難上市路賒良友久無音不如一洗炎威去醉屐蹒跚游亂林

和子粲今日吟

今日且須娛眼前窮通有命豈尤天柴薪理爨妻兒健藜藿防饑父母全茹屋雖粗可容膝村醪不美尚添眠保身亂世度春夏隨處君恩肥石泉

隨處君恩肥石泉貧中身世自安便友風子雨酒無俗席地屋天詩有權涼月窺簾搗丹夜流螢弔戶閱書邊人間萬事塞翁馬今日且須娛眼前

拙技

拙技從來人不信林頭閑却小青囊狂愚幸被故人顧試得一匙解慍方

和歌題

疎鐘斷續送蕭條顛轉待人魂欲消誰謂合歡衾未暖鷄聲早已促殘宵

有約待人人不到更更聞盡五更鐘休謂晨鷄別離恨癡情難割淚霑胸

賀竹塢山子新婚

媒將才子配佳人綠意紅情正耐親恰是炎炎鑠金日滿堂和氣總如春

如雲隱士新應知事公辟起爲家令蓋悲非其本志未知慶弔如何也爲賦贈一絕聊慰之不知果適高意否
休言顯達素心違付與箕箒雞鳳肥樂地優游君自慰錦衣未必是朝衣

送伊東主靜山本竹塢之任東京

戲笑提携百里程滿天霜雪向東京風流吾想連轡興榮貴人
稱聯璧名茶鼎沸邊諳世味酒盃飛處喫時情邦家回護自家
事更以偉勳答聖明

臘月初三別酌於竹塢寓居

別話匆匆對暮雲滿胸愁思亂紛紛京城豪興蹤如夢野酒村
餐復送君

臘月初四別飲於主靜寓居

訪來廻雪急風天一盞聊開離別筵不厭醉歸泥路滑團欒相
話又何年

歲晚書懷

滿眸雨雪日霏霏朔吹砭肌酒力微迂願半生無所就浪蹤五
歲竟何歸頭將禿處逢新政志欲灰時覺昨非多少依歡卅年

事燈前一夜夢依稀

庚午新正

流寓徒過五歲春今春稍覺物華新醫門雖小班三等斗祿不
豐餽數人澣濯衣裳僅成禮敗殘筵席且迎賓一樽野酒一盆
餅竊拜君恩獻二親

疊前韵

三十添來八歲春偏驚世事日滋新齊門鼓瑟堪嗤我堂下哀
牛何怪人迂學元宜窮益固浮名未必實之賓不妨茹屋寒威
酷村釀一壺猶可親

算馬齡來將四十愁顏唯覺二毛侵微醺一笑把明鏡照見衰
年養髮心

三十餘年心事疎每逢歲序嘆居諸迂生猶笑存迂願讀起一
編陳蠹書

梅竹居遺稿
三〇
百般曲學混皇州正路誰論方技流吾輩思當在這裏不妨呼
馬又呼牛

送野島伯亨之東京

誰道函關行路難一鞭只合任征鞍君須愛護朝昏事都上春
風猶自寒

偶成

二月中旬梅漸披山邸節物易違期溪邊昨夜一簑雨寸大游
魚上釣絲

己巳夏秋之交君公病甚當直作

君王病久臥深宮況是萬方多難中五歲儲君纔戲謔七年陳
艾奈疲癯報秋蟲語夜偏冷釀雨雲容晝尚濛拙技堪嗤又堪
恥漫將奔走償微功

有感

狂癡只合守狂痴唯我狂痴唯我知先哲有言須自戒得便宜
處失便宜

送山田三省

又向天涯遍叩師喜君壯志不遲疑時風未踏西洋浪意氣猶
探東海奇友友德而皆益友醫醫國者是良醫從今各地須相
勉一等名望果屬誰

送小川隆德

春日晴暄春服輕颺然書劍向東京君探英佛文明學吾守漢
秦陳腐名一曲悲歌遲暮淚三盃濁酒別離情長程好去千餘
里到日鶯花正滿城

戲寄主靜

滿眼鶯花紫陌塵憐君春恨日愈新千金難買美人淚墨水樓
頭獨弄春

寄戒桃塢

憐君官學已三歲留守勞劬又可知失母幼兒傍晚泣抱痾阿媪倚門悲曾無少婢給縫績豈有老奴供爨炊家計紛紜難理得秋瓜時節莫愆期

春盡

春夢窓前欲覺時落花啼鳥日遲遲酒盃吟社無消息一段閑愁付古詩

復主靜書

主靜東君足下分袂而後音容兩絕春來一再脩書未得貴酬寒暄不順之交不知起居如何朝昏快快常以爲念忽得鴻音忙手開緘薰誦數次備悉近況恰如接芝眉欣喜何加兄客冬祇役之後獨力周旋以應內外事務賢勞可思爲邦家幸自珍是祈承諭居僻地而守僻論非古愚而真愚也矣宜遊東都而

見巨大病院之模楷也蓋就拙作詩中謂之也雖是兄一時戲言深中僕平素之病自非知己如兄者決無此言當翻然悔悟速從教也然而僕也頑愚迂僻日甚於一日非復舊日之阿蒙宜俟他日面論今不縷陳特怪兄平生嗜聖賢之典籍平生稱聖賢之言語氣節識見非尋常書生之比一旦幸遭遇明時當大恢張心目而維持風教也不宜同流俗合汚世爲鄉愿一派之態也而今有書中云云者頑愚迂僻之非所得而知也深夜思之遺憾塞胸疑且惑者連宵兄幸少容僕之狂言爲道再三思之却說舊君知事公宿痾荏苒雖證有緩急究竟一日加於一日真千里同歎也竊聞有辭職之舉噫痛哉世子幸強健屢出入於政事堂及練兵場等威容日可見唯是萬愁中之一歡也焉耳山田小川二生前月東上島伯亨亦續上宜面聽今不復贅當日托三省之書及囑伯亨之事以鄙書煩貴人失敬不

可謂敢請周旋勿叱多罪高吟一首見兄之苦情可憐戲次韵
却呈寄語於舊社中謹諾近時舊社寥寥唯有子粲沈鄉二三
子而已雖然子粲再就官途俗務紛冗或時不得閑話沈鄉貶
黜慷慨激昂無復優游歡娛之情僕依舊奔走僅以晚酌爲一
樂唯喜一家安寧笑謔消日隨意探韵隨意取睡或緡蠹簡閱
古或披稗史驅睡魔自誇於舊盟中僕尤得高地蓋此亦迂頑
之所致歟天算乘除予奪無偏可不感佩乎足下以爲如何野
調一兩首呈左右供一噓可以見林泉高臥之清福但詩依舊
拙甚覆醬爲大幸時逼梅天伏冀貴體保護莫爲功名劉喪仲
夏既望古愚陳人賴善拜復

副

近日醜夷雜集妖氛滿街衢一聞欲嘔兄勿復言唯東京
樣佳人楚楚動人云云風流可想也僕近來有命養髮將

俟全長之日而一豪游逞才人之技爾也君請刮目俟呵

呵

次韵

古筇敗屐足清遊誰謂人間不自由堪笑朱門奔競士友
風子雨却生愁

首夏

茂林之側水之涯流過經年自作家請見幽棲好風致啼
鵲綠樹煑新茶

八月初五本多氏小酌口占

避雨友人屋閑庭蟲語深論談無冗話傾酒且傾心
養髮半年許含杯廿歲餘頑軀何所取唯未讀洋書

仲秋後一夕賞月

三徑草深蟲語幽清風明月對溪流偏憐百丈腥羶氣不犯廣

寒宮裏秋

滿襟風露夜初闌月影依依照筆端幽賞誰知環堵裏今人尚
作古時看

次韻子粲

休言世事紛難支一片冰心尚可持天意從來無厚薄人情元
自有尊卑未能幽討耽泉石堪以疎狂付酒詩陋巷偶逢紅友
熟去看霜葉滿林枝

長嘆極處少長嘆心不寬邊却自寬濁酒三盃開口易荒田二
頃息躬難未追東海波間感且擬南華夢裏看小技俺甘太鵬
咲優游先占一枝安

冬曉

醉夢驚回冷臥床起溫殘瀝坐爐傍沈沈月影霜如雪水碓聲
中夜轉長

閏月念五沈鄉席上酒間口占

山路登登幾往來相逢相值笑談開半非半是人間事付與寒
窓酒一盃

至日書懷

兒摘芳芹婦煮魚貧居至日也佳夫緼袍一領未須典野釀半
樽且易需滿野風霜梅尚瘦二旬病枕硯將蕪堪噉綠酒紅燈
會不屬痴頑迂拙徒
半生小技分區區何問人間贏與輸古鏡影中梳短髮做衾臥
裏護頑軀寒厨新釀功猶薄荒圃老梅魂未蘇唯喜聖朝恩意
厚不饑方外一狂愚
迂人嚙敏敏嚙迂萬事人間夢有無我愛風流大參事溫柔鄉
裏護其軀

寄懷木下文庵二首

別後匆匆歲也過忽逢書信感情多聞君抱病絕紅友寒夜閑
愁定似何
滿天風雪砭肌膚此際何堪慰病軀憐汝纔逢穉陽動早梅香
裏護清癯
休言病境不聊生病境却忘浮世情藥餌從容須愛護風霜近
日不堪行

至日夜舉一男兒醉中記喜

風霜日夜滿蒹葭醉典裳衣此一時寒士衰殘未可侮呱呱舉
得大男兒
呱呱舉得大男兒恰是一陽來復時兒也有知當冷笑酒錢從
此漸難支
酒錢從此漸難支百事營營癡倍癡喪父舉兒悲喜裏風霜日
夜滿蒹葭

聖代雄圖維日新舉才草莽無逸民一言警汝須強記勿類乃
翁迂拙人

分居令下賦謝恩併留別中原諸友

老穉倉黃何所之分居策成各分離經營期限稻禾節移任謀
勞風雪時賣劍人論墾田利易家士費買山貲東西占去村村
裏泉石煙嵐屬阿誰
偶然占得武陵津藥石詩囊不負身野服時隨樵者步人言都
似避素人
迂拙自甘方外人懶添紫陌逐紅塵殊恩幸賜安身地不負素
心不死貧

臘月初六舊君有賜恭賦一絕記喜

寒窓夢覺思依依回首桑滄事已非忽爾寮朋傳寵命淚零舊
殿舊章衣

有感

寧莫言耶將大言連宵沈思淚爲痕迂愚論策君休笑猶是一
毫忠愛魂

庚午歲晚

又逢歲晚倒孤樽喚覺十年憔悴魂窮達從來豫難定是非到
底復何言鏡中已見二毛影衣上未乾雙淚痕猶有貧厨存斗
米聖恩併拜舊君恩

辛未新正

去年今日侍家尊蝸屋猶開好咲言今歲無人爲座主拊花盃
裏暗消魂

滿天風雪鎖春家一樹疎梅未着花唯喜北堂猶健在兒孫對
話舊繁華

迎來二十九春流寓五年春不春去入桃源期在近今春孰

與去年春

將入勝南郡留別諸友

西邱南壑各分居恨殺交游日漸疎訪否武陵溪口路煙霞鎖
處是吾廬

恩賜將營梅竹居錄舊作記素志聊自娛云

偷閑忙裏去忙裏自成閑一卷書娛眼三盃酒解顏聘懷邱壑
際言志竹梅間僅是消憂地即吾着屐山

羽仁村寓居吟

里名且喜號仁村托得半生萍草根一帶林泉別天地數家鷄
犬小桃源梅風徑畔酒旗動竹樹窓邊鶯語繁更喜溪頭新築
近携兒伴母步黃昏

吟行

短屐孤筇興可乘喧風遲日度邱陵誰言流寓無聊甚新識江

山新識朋

過連石村

石路登降欲倦時古筇扶喘步遲遲歸來稍有快心事折得早
梅花一枝

二月念又六日訪法壽山觀音寺席間口占

櫻花爛漫酒氤氳滿院春光轉可欣更有遠公能愛客圍棊幾
局到斜曛

暮春偶成

乳燕聲中春色闌柳吟花醉興將殘貧家別有清幽事一摘新
茶上野餐

萍跡漂移水際村酒盟吟社幾人存閑窓細雨春蕭瑟暫擲丹
書讀畫論

次伊東主靜雲煙卷舒四律之韻時余亦拜恩將營梅竹

居頗勞意匠故粗陳其梗槩以爲題但詩拙惡甚者以其
注意於實境而不假一點虛粧也耳看家怨諸

屋地經營心匠紛荒園數畝雇人耘迎風庭北先栽竹穿牖天
南欲望雲泉接庖厨兼注藥机安藥室併舒文默思冥想半年
許多少工夫日易曛

雙膝將容屋數椽南窓寄傲定悠然冰魂應伴羅山夢露葉好
籠淇水煙利走名奔竟迂事匙耕耒耨是因緣閑人却咲急歸
計幾首先栽卜築篇

醉來吟步應聊遣二徑草深溪水淺浪井宜浮供客瓜貧家何
用護門犬無邊風月興堪乘不盡煙嵐懷可卷別有蠹編誇濟
生迂愚衆裡稱冠冕

既將丹石混耕漁豈向朱門復曳裾魚蠹簡繙燈下闕竹梅字
就壁間舒清風陣陣午眠後涼月依依暮醉初竊喜君恩屬吾

有朝昏伴母摘園蔬

早行押淵村所見

涉溪傍水步徐徐一領輕衫涼有餘隔岸喧聲何所見有人破霧打香魚

展墓

一掬清泉一瓣香愴然拜跪對斜陽魂兮今日勿關意孀妹妻兒皆強康

次韻寄懷主靜

東京情況近何如當讀流金爍石書請見贅人閑事業北窓高臥賦山居

喜雨二首

一犁膏雨入庭除園卉朝來都灑如却笑閑人亦多事指揮鄰叟種秋蔬

滿溪雨勢傾盆到一枕涼風金不如村俎昨來頻暴富鯉魚僅了又香魚

臥病有感賦似瀧子長

落魄零丁六七年南村北里已三遷呻吟母臥敝衾裏匍匐兒纏瘦膝前邱壘放懷非善計耕漁混跡豈清緣聖恩猶喜貧厨給微恙連朝癢藥眠

疊韻

世波出沒卅餘年頻駭桑滄幾變遷百歲名何要身後一樽酒且了生前曳裾臺閣雖無意洗耳溪流尚有緣環堵落成期在近松濤深處好眠安

聽瀧子長臥病寄懷

滿眸秋色日蕭森知再呻吟坐夜深藥鼎聲邊思沸沸書燈影裏夢沈沈蹒跚人謂真患痺偃蹇我疑姑學瘖俯仰優游須自

愛由來駿骨貴於金

冬至小酌示浦上琢磨

野酒村餐且會賓醉來姑覺一陽新却嗤今世競奇日祭祀神農有幾人

寄瀧川氏

微恙連朝不可風心中便覺已忡忡憐君半世凌雲氣藥鼎爐邊空自雄

寒疾數日有懷瀧子長

病有緩急治亦同無情藥物叵期功養生妙訣君知否都在安心定慮中

歲抄書懷

小技營營歲復移漂零笑我小生涯溪村雪意風偏急林澗霜威梅尚遲消却窮愁唯有酒寫來懷抱豈無詩柴扉客絕寒窓

靜醉墨揮毫什大兒

壬申元旦

雨雪蕭條田舍春疎梅短柳未覺新村醪一醉睡隨意強任身如致任人

又

欲弄梅花笑繞檐殘軀何厭二毛添更無一事望人世只願時平酒價廉

又

山村流落幸安全阿母康強病婦痊末路任他貧到骨不饑不凍復新年

送浦上溫卿歸姬路

先有子長後溫卿相尋遠途叩柴荆不啻空谷跫音感偏喜斯道好干城余元寒陋一迂拙僅以刀圭供鋪啜醉生夢死三十

年未有一事誇奇說謾繙長沙蠹殘經故紙堆中抽空青指摘
得失果何如余姑妄言君妄聽夫醫之學在實際言筌字蹄不
可泥紙背三寸徹眼光妙理須神會默契方無古今期治功論
無新舊尚圓通一七桂葛半刀割須贊化育補天工君不見武
斷鹵莽蔑古義緣木求魚自爲智又不見孟浪竅混沌者買櫃
遺玉竟何爲八十一難素靈書陳篇時宜供卷舒博文約禮聖
謨也古人斷斷不欺予予受師既如斯矣余授子亦唯是已去
去宜再思歸日且一議諸子長氏

穆清來訪喜賦

村釀頓增價故人舊笑顏相看他語論水又評山

寄吉田氏

寓舍相鄰流落餘貧交却喜不稀疎半瓢殘酒與蘭處一枕新
茶談熟初

有感似吉田兄

噉嚼姑相托憂愁可奈何茫茫塵海裏無復舊恩波

癸酉一月一日醉吟

聖朝神算漸將成文物典章幾變更一笑山中無曆日傳聞鄰
叟賀新正

一月念日訪山田氏席上醉吟

雪裏重敲故舊門醉傾心事幾番論主人賴有回春力使與梅
花俱返魂

偶成

甘分人間貧與愚窮陰何必哭窮途全家雖病藥無債二逕就
荒詩有逋山肉半肩時易得村醪一醉豈難乎休論世事變遷
甚竹自青青梅自癯

送吉田氏入石州

傷鳥濺花語旅愁八年流寓尚綢繆春窓夢覺永分手一醉相逢果在不

癸酉三月十二日有二十二區小學校教師之命戲賦一詩

鄉校新聞三十區漸觀教化及邊隅庸醫自笑難醫國姑擲刀圭擬腐儒

不向人間鳴不平看梅弄竹送餘生迂人拙矣歸農策翰墨時兼藥石耕

入飯岡村有作

雨霽閑人幽事繁也欲吟杖趁晴暄山腰斷續雲藏寺溪脚參差水抱村薄霧遙籠漁舍外青帘高動酒家門尤欣童子粗知禮笑語逢迎對客溫

飯岡村學舍寓目

山光爽朗水光清十里膏田入望平早起明窓掃榻坐吟唔聲接掉歌聲

癸酉歲抄口占

舌稼匙耕也歲除自咲生計太迂疎今年所得知何物粗朴三閭梅竹居

庚戌新正

臘雪不融梅不開山村未覺穉陽回今年第一新詩句僅自兒遊聲裡來

新正醉歌步鵬齋翁之韻

彼一時也此一時村釀一醉尚堪爲遮莫交遊日漸濶窓前梅竹不嫌癡昨來貧厨誇暴富滿盤猪兔肉累累陶然而飲頽乎睡不關世事變於晷休論快樂久不久到底窮違屬天剖明日宜有明日策今日頌喜 聖恩厚七耕兀兀二十年老大自咲

何所取風月場中幾扁詩槽拙爐畔一壺酒人謂素餐尚天賦
俯仰護得六七口始信生前酒一盃勝他名聲垂不朽借問風
雪街頭人也有似我景況否

甲戌歲抄

眠食蠢然幾歲除狂愚自笑與時疎貧家猶幸無逋債深鎖三
間梅竹居

明治八年癸亥歲抄口占

斗祿拋來此一時小黠太痴信人嗤年年除夕探詩手謾把牙
籌屢撚髭

本年奉還秩祿
之半故云

臥病偶成

奔走風塵歲又遷廳零未賦卜居篇愁催白髮三千丈感伴青
燈二十年藥石從來難療餓詩書畢竟易妨眠迂愚堪笑却堪
訛碌碌猶纏阿母前

黯淡雲容炊雪天疎慵日對竹爐前祁寒侵處酒添價談話闌
時茶有權窮士風流只慵詠貧家佳境是安眠鄰翁不解主人
意晨夕慙慙問未痊

仲冬初八夜夢故綠竹山公

便腹天天笑對碁分明當日舊容姿風影驚破寒窓夢未有餘
談及藻思

歲抄口占

斗祿纔防寒與饑飄零笑我小生涯病魔未去又窮鬼滿眼風
霜歲暮時

閑中四樂吟步子粲韻

疎狂護得一閑人更有閑中樂事親謾倩煙霞洩懷抱靜繙書
帙慰心神團欒剪燭談今古俯仰含盃養性真一睡一醒吾事
了優游長占百花春

詩賦

原題倭歌○子粲長國風
余不敏未與聞故換焉

吟賞餘得二兩編半生游跡自依然寫出雪月煙花態筆端謾
弄造化權消魂寒砧孤燈夜騁懷暄風遲日天冥想未通池塘
夢風流會擬一斗篇終年兀兀苦吟客清癯人笑學詩仙長日
閑窓試茶味細雨燈前親爐煙有時朗詠得意句何者塵慮不
可蠲東郊西郭花亂發騷社消意晨夕傳蹒跚穿去謝公屐徘徊
掛得阮子錢三春行樂真可樂醉墨又試數十言

讀書

三閭茅屋一床書寒士生涯自淡如賢自賢愚自愚矣立志從
來太異乎魂爽燈火可親處氣平念慮未發初簡編常投閑中
讀勤研何必在三餘一世娛樂俯且仰百年心事危又舒見得
便腹多糟粕小心只合循聖謨寸心何用徒計較天算元自有
乘除到底萬事塞翁馬榮枯得失互有無三十已見潘生鬢燈

前形影我慙吾寂寂寥寥小窓下贏得乾坤一贅夫

談話

談論熟處茶味香貧中交態不尋常說來說去知何事江山風
月細評量慙慙不勞投車轄何況趨走倒衣裳扼腕時錯悲壯
語蠻夷可攘妖可攘坐上金玉乍發韻胸中錦繡自洩光懽然
相見莫相逆此時姑與形相忘一日三澹安我土百年一日仰
彼蒼春往夏來環堵下笑語團樂樂歲獲見得一夕燈前話勝
侘十年讀書長清風又想孔北海樽中有酒客滿堂

盃酒

原題煎茶○子粲嗜茶不嗜酒余併好之余之勝子粲唯此一
事而已真可笑且可愧也而其可誇者亦在於斯故姑代之

獨對青山開孤樽且向靜中養此心俯仰盤桓吾事足悠然占
得太古春吟魂動時興鬱勃花香傳處氣細紆坐感古今異清
濁更觀嗜好判新陳從來解得盃中趣放曠何論劉伶倫閑情
聊比歸田士遊討豈學掛錢人一觴一詠也既醉玉山頽來花

爲茵妨妨官途多艱險歲月優游方外身要知三蕉忘憂慮多
少無量不亂神三竿紅日伸脚臥數聲黃鸝帶夢聞

煙波晚棹園

晚煙渺渺水如油一棹飄然任去留不是秋風釣鱸客定知月
夜訪朋舟

初秋林居

三旬苦熱彼一時偏欣秋爽入茆茨閑窓睡足晝蕭寂起伴兒
童縛菊籬

秋晴郊行

雨霽秋村幽趣長也勞吟杖獨彷徨蕭條落日無人伴一路閑
花蟲語涼

丁丑新晴

四十五年心事非未知四十四年非年年依舊添非去五十六

十非益非

我嘆吾十首

少年謾志學四十歲空徂一事終無就茫然我嘆吾
才疎志空大期不老區區一事終無就茫然我嘆吾
煙花奪斯志泉石誤斯軀一事終無就茫然我嘆吾
磨來滿腔智撚斷數莖鬚一事終無就茫然我嘆吾
小才安小技賣藥適時需一事終無就茫然我嘆吾
沈埋草藥底甘混樵漁徒一事終無就茫然我嘆吾
四十猶碌碌五十亦何殊一事終無就茫然我嘆吾
衰殘加癩癖詩酒自聊娛一事終無就茫然我嘆吾
纔依三斗祿俯仰護妻孥一事終無就茫然我嘆吾
欲追陶氏富齷齪射鎗銖一事終無就茫然我嘆吾

大戶歸路

梅竹居遺稿 四四
清流好是洗餘醒短屐古筇任足行一路江邨人未起滿眸爽
氣葛衣輕

哭山本晉

蟲語風聲轉寂然聞君去入九重泉豈計寒宵一樽酒終作千
秋永訣筵

天道是非果若何也教才子天沈痾柳吟花醉夢無跡泣讀當
年唱和歌

恭拜 舊君三位寫真謹賦

眼光凜凜映射人喜見寫真尤逼真休謂病羸年漸劇儼然當
日舊精神

不待溫顏三兩年儀容頓覺轉端然料知當日戲嬉手移向泮
宮陳豆籩

閑雅風流是性神不須粉黛汚其身鏡中別見容華減想像深

宮幾苦年

先君逝已四年獲之於村人垂井兵平之宅乃書
卷尾藏焉明治十四年在辛巳夏六月男萬記

病中歲晚口占 丁丑

照鏡自驚顏色衰青囊檢藥屢沈思殘形一片何須惜獨有高
堂霜鬢垂

藥鑿聲裡臥茆茨滿眼風霜年暮時多少英雄皆白骨死生有
命復奚疑

病中新正 戊寅

藥餌營營歲復更寒牀撫枕入新正咿唔聲斷書寮靜感沸音
生藥鼎鳴傲骨瘦來難頓肉壯心磨去尚纔明唯祈早曳觀梅
杖溪北溪南隨意行

冬至臥病執筆似諸子

一陽來復是今朝例會門生共半宵自笑主人衰病甚藥湯換
酒送蕭條

除夜祭日昌社

明治十年十二月三十一夜歲除時乃欲祭日昌之社病間擁
褐尚護肌不灌鬢兒不設位不盥不漱不整衣謾向空冥匍匐
拜默禱瞑目盡我私曰昌社中神在否平生不祭我不知在與
不在不必問唯陳吾喜呈祝詞抑我者流赤貧士落魄零丁客
天涯山邱絕巔窮谷底柴戶茅檐或竹扉五斗廩粟患斷續一
盃濁酒與心違壯志傲骨都瘦削蠢然俯仰餽妻兒一朝號令
數朝野家祿奉還急燒眉半信半疑畏且惑輿論紛難辨是非
我輩甲乙互商議武斷勇決不顧危全數半額信所好各各還
却請產資再來構得一團結貸借方法僅創基利子低昂期長
短社則森嚴守成規出納融通如流水無足而走無翼飛有不
速客遠方到禮意懇懃不亦怡利子生子又生孫二歲所得始
倍蓰二分三月是目的今也便過於所期社員勉強亦卓絕簿

策會計適攸司纖悉懇到無遺算呼作銀行誰得嗤顧觀世間
同體士不是因循或妄施于農于商于工藝頗焦神志勞四肢
一敗策屈無後援刀折矢盡泣殘陣此輩心事其勤矣只是薄
命真可悲否則千金一擲膽東京西京乘車馳高帽義兮洋服
粲朝投劇場暮妓圍秋風一夜囊底起一縷命脉忽枯萎彷徨
恰如喪家狗兄弟妻子各分離噫彼才識非讓我我豈智術勝
彼爲到底各自私一已無復衆力相維持自贊喃喃如謔語心
魂恍惚羸難支夢中有夢夢生夢困睡一刻涎粘頤暗中忽然
有聲曰善哉哉善我應祈貸金收利雖似吝貨殖保家理所宜
況於方今士流產朝旨既有所指揮汝等社員雖愚魯戮力協
心膠漆依經營大率貴平實不挾詐僞以自欺我愛汝等雖好
利每尋條理再三思陽慄悍而陰仁弱言似小黠行大痴最愛
證券數千通未嘗訟庭假官威舉措進退離迂違不敢妄增人

瘡痍故比尋常射利者利欲場中見小慈善善哉汝社員福田利益所以歸汝不知乎二歲旱天如爲汝謀出奇乘彼窮乏逞我技宜矣瞬息立勝旗雖然幸慶難常會天有晴雨月盈虧謙益滿損古人訓節儉簡約可以師且夫歲運有消長世態變化甚於碁利子低昂貴張弛莫失人望須見幾嗚呼富者衆怨也行路之難如席雖廉恥禮讓重交際戰戰兢兢當防微我今爲汝一來格乘汝睡夢入心脾粗論天道與人情姑代造物漏天機汝今苟在議長職宜向社友詳傳之汝等敢或慢神語福神忽變窮鬼姿予耳窮鬼心忌惡不覺枕衾一齊推欲張瘦拳擲炒豆霰雪迸窓聲正滋

梅竹居主人戲題

病臥三旬體倦神羸一部韻礎猶且嬾檢索牀格滅裂造語鹵莽一誦自欲嘔且呵凍硯揮龜手固所不能也姑使

大兒代寫以俟他日之推敲耳觀客怨焉戊寅一月上澣

病生又云

病中書與三兒

爾等伯仲季謹聽我訓辭我若病加劇將不暇于斯兄弟本一體故喚稱連枝不啻禦外侮莫倣閭墻爲當盡友愛誠綢繆長相持兄弟相仇視譬猶斷四肢人之所以貴爾等要先知仁義及忠孝學識爲之基螢雪互磨礪過失相箴規確乎守志節終始勿顛墮攝養保康健遺體慎重之強勉或失度多易致病羸溫淳尚廉介小心不近危對事惴惴焉戰兢臨淵池交游擇良善忠信以追隨而不偏愛憎自儉喜博施奢靡與鄙吝汝等須絕離浮薄及巧佞乃翁常所卑最戒酒色博遊之如魑魍堅忍與不然賢愚所以岐少年業不就老大空怨咨一作馬前卒莫入韓氏嗤伯汝已成童人事應粗窺况承箕裘者在重異他兒

龜勉執家政俯仰護寒飢靜儉以自正寬猛可制宜高堂餘祖母齡高霜鬢垂汝逐李密跡奉養願不遺養母育二弟百事紛如絲學業乏餘力周旋尤可思感戴聖恩渥報酬心當期舊君祖先澤服膺永可惟負笈游千里奮然莫遲遲洞察垣一方莫伍尋常醫被遊冶友誤勿受花柳欺履歷汝須慎二弟恐以師常抱桑梓念休生倚門悲晝錦耀鄉里夙取團欒怡仲汝雖幼弱既入小學籬自洒掃應對晨夕習幼儀敬兄愛小弟實踐焉容辭光陰流如水勿謾耽狂癡師父視兄氏進退仰指麾獨立則獨立否作良家嗣季汝甫五歲唯饜菓與飴頑縱弄母乳啼哭混戲嬉威武不能屈針灸亦難治此二句一作菽麥未知別誰辯烏雄雌呵叱意無益嘆息徒撚髭唯祈全天性幸成丈夫姿傳聞母兄訓想像乃父慈九此數百言肝膽何足披訓詞有節略汝等須類推汝等三子者終身遵守茲時或生葛藤猛省讀此詩嗚呼警焉哉伯

仲季勿敢或背馳嗚呼勉焉哉伯仲季勿貽大豚訾

一月上澣病間探韻舌強筆澁不啻體格風調之拙惡更有意到而筆不到者存焉特欲曉兒輩一片老婆痴心耳

梅竹小居病生未定稿

病中謔語二首

皆言開化文明好開化文明日漸多一種淳風吹不徹文明開化果如何

風俗人情幾變更頻年兵甲未全平寄言海內諸豪傑莫爲功名誤聖明

十年守拙臥幽叢世事何關馬耳風垂死病中却堪怪一聲大喝罵英雄

偶成

一家七口僅安全雖病累旬安枕眠春餅冬蔬都整理貧厨尚

有買魚錢

爨煖衾稠婦煮饘防寒良策日嚴然大兒別給刀圭業擣鍊煎烹侍枕邊

藥餌百方頗費神貪生豈止爲斯身膝前兒輩高堂母談笑與

誰長占春

結一作誰共游優占得春

謝羽淵桃塢屢訪病且惠魚

寒風獵獵雪霏霏問病幾回敲竹扉多謝青囊一匙外鮮鱗作膾療吾饑

寄猶興舍

三旬衰病鎖柴荆不向諸君問課程竊喜嚴冬切磋倍曉窓每聽讀書聲

大兒名字及號之記

名曰萬字一以號以思軒蓋取義於三略之蓄思不倦以

一取萬之語云乃具野酒村餐以表元服之菲儀病間勉

書一詩附與之

紅飯枯鱗豆腐羹聊慶元服表爺情菲儀示儉汝知否家道渾從這裡生

謝猶興舍諸子屢問病惠物

鼈羹魚膾足寒厨併喫芳情慰病軀多謝慇懃諸彥意飽將滋養起衰夫

從十五日以後寒熱殊甚吐一詩代呻吟

寒去熱來昏又晨更加咳唾惱吾身清癯自分平生志骨立如斯或業囚

門生一色新一月十八日卒然來訪病且云明日游學於

浪華病牀走筆送之

負笈俄然遠索師喜君壯志不遲遲唯祈終始遂其意畫錦應

娛巖興慈

一月念又三日作

壯年自分填溝壑幸托殘軀溪水潯衰病却迷生死路痴情時
動兩端心

臥病六旬荏苒日甚於一日舉家顰戚不復知歲晚新正
之爲何物滿室之酸情不可名狀也近頃病勢稍輕起居
飲食頗覺快意家眷欣欣喜動顏色予亦觀之意頗樂乃
執筆記之實二月二日而陰曆則正月元旦也

林庭雪霽竹窓明此際沈痾稍覺輕家眷具先梅柳展欣欣更
賀舊新正

辭世一絕

遂愚守拙竹梅間四十餘年夢亦閑一片殘骸付兒輩魂遊怪
石大松山

右辭世一首先考易簣前三日床頭勉病執筆書之唐紙
半截書了昏暝萬時年甫十六涕泣拜受焉事如昨日匆
匆既五十四年萬齡亦屆古稀今當校遺稿收之於卷末
俯仰今昔感慨殊深

梅竹居先考雅號遂愚守拙亦皆其別號

昭和七年晚秩

男萬謹識

拾遺

童子謠

能勢道仙著

代序

綴作歌謠數百言童蒙入學是其門婆心一片君休
笑欲伏草萊酬國恩
梅竹居主人題

夫童子之所須知作謠歌之代戲嬉上覆者天下載地日月星辰天象垂地亦空中一星耳故與月星同轉移唯曰居中光且熱晝夜暑寒實由茲雨露霜雪又雲霧昇降變化互相施人物繞地到處着上有大氣壓且圍大地引力又牽任附麗不離奚容疑養輕淡炭氣有四輕氣時動爲風吹別有雷電成一氣取爲器機是電氣天文地理古尚暗方今發明無所遺五行水火木金土其理亦未究精微元質六十有餘品化成萬物生植滋

禽獸草木蟲魚介萬物之靈人當之人中至尊稱天子繼天立極高巍巍二種神器劍鏡璽寶祚萬年無盡期公卿以下至士庶乃爲百官爲百司人人奉職執事務經理國家護四陲人類業異名亦別士農工商及巫醫神官僧侶各守分亦皆勤業供役廝五常仁義禮智信人身備之言秉彝五教親義別序信人道不可須臾離喜怒哀樂愛惡欲是七情也當慎幾身體髮膚受父母父母幹而身則枝顏兼手足曰五軀五臟心肺肝腎脾外貌眉眼耳鼻口胸腹腰背筋骨皮不敢毀傷孝之始孝弟即是仁之基禮樂射御併書數古曰六藝所當爲禮樂自有國典在朝野遵奉長弗墮射御亦我古武技邦俗長武比倫稀外國傳來唯銃礮百中不復失毫釐雖然講武官有法習技貯器不許私書數童學最所急夙從其師勿遲遲讀書今爲學問要神典國史先繙披和歌古今有長短卅一言最見風姿四書五經

漢土籍又有歷史與文詩五洲萬國各有字其書千萬皆新寄就中擇其切近者翻譯彼文爲我辭小學所課乃是物簡直平易可唔咿誦讀晨夕不可怠日逝月去駟難追二十四字一日夜日月時歲次第推月是十二有大小春夏秋冬是四時日是三百六十五積累合算成歲暮四歲一日置餘閏終而復始無參差甲乙丙丁戊己庚辛壬癸及子丑寅卯辰巳午未申酉戌亥名之曰干支紀歲月日表字刻度千萬年無乖違又有年號以名歲方今須知是明治五節中元今已廢沙汰奢侈戒狂癡諱日祭辰天長節欽慕神德仰皇威德光被四方國締交不復論華夷四方東西與南北分爲五洲各有畿亞細亞又歐羅巴南北阿墨又阿非中列萬國難枚舉東南海島更沙瀾列爲一洲亦有理審之當觀地球儀皇國位置要先識亞細之東海一涯國數往昔六十六今分八十五維持府縣鎮臺鄉村郡安

排布列恰如碁凸而峙者名山岳凹而瀦者曰澤陂水流不息是川也流悉入海不復歸海水不增也不減此理最妙須尋思航海渡川舟與筏檣帆楫櫓國章旗火輪尤是重器械來往大洋如小池陸行馬車又蒸汽一瞬轟轟自在飛書信往復郵便在四面八隅傳命馳奇巧尤物電信器迅速難測妙叵窺是等皆外國所長採彼所長補我虧我之所長農桑是國名瑞穗土自肥五穀稻黍菽麥稷種栽田圃可無飢培養耕耘適其度或相千萬或倍蓰撞花蠶絲及麻泉縫績織紵以供衣五畜牛馬鷄犬豕供役充食各隨宜家屋取材於竹木或用瓦葺或茅茨室中隨處敷筵席廣狹適宜著障帷夙興掃塵速就業夜寢警火堅鎖扉貨幣金銀及銅楮是爲交易之本資交易方今最急務開港之地列海湄橫濱兵庫及新潟東有箱館西長崎百貨輸出獲大利尤重茶葉與蠶絲輸入諸品其尤夥棉布嗶呢及

玻璃內地商法亦曰盛物精價廉不相欺衣食住具生涯足仰事俯育樂雍熙唯畏飽暖逸居輩不免古人禽獸豈聖明深鑒庠序教都邑鄉黨立學師斟酌和漢萬國間嚴設課程授童兒君不見皇風加處草木靡開化一新仰德輝寄語學中秀才子
一等高級屬阿誰

代跋

拙稿中事關於先君者數章附錄卷末以代跋文

昭和七年初冬

萬又識

奉哭先考梅竹居士攀其絕命詩韻

先考易贊直後所作

逍遙曾樂竹梅間君去竹梅猶獨閑日暮幽窓人不見一痕新月上西山

壬辰五月一日先君十五固忌辰謹賦

在仙臺時所作

泣薦今朝蘋藻馨落花時節雨冥冥半筐遺墨人何在十載孤墳苔也青未及姓名垂後世且至身体祭先靈傷心追憶舊時事膝下分燈聽講經

客舍會古中元 同上

秋入征衣易斷魂今宵況遇古中元客窓回首墓門遠月白不忘山下村

甲午五月初一當先考十七回忌辰俯仰今昔不堪
風木之感因分其辭世詩句魂遊怪石大松山七字

爲題賦奠同上

落托兒曹尚犬豚哀哀何以報深恩沈思三十年間事一穗青
燈夜雨魂

瘦骨蒼顏雪滿頭一生遭遇半窮愁豚兒今耐護琴鶴內顧罔
妨天上遊

韻迹曾留文墨界無聲詩又有聲畫客遊奧東恨何堪不奉君
探泉石怪

墓門春草年年碧半畝丘陵堪托迹別有流風薰里人千行淚
墮一苔石

數戶春風酒家旆一帆明月江魚膾先生本領少人知自稱人
間窮措大

欠

欠

衣向墓門

俯仰某山某水間曾勞遠夢幾回還垂髫五十年前客白首今朝入故關

吾祖吾親吾弟兄眼前彷彿舊容姿怡然欲語消無影春冷空山煙雨碑

一時絳帳足春風德化尚傳閭里中父老視予猶視父相逢皆說面容同

父子相依憐影形當時庭訓太丁寧難忘村舍綠蔭夕膝下分燈聽講經

大正十五年四月伴兒克男弟二郎歸鄉

在名古屋時所作

滿頭白髮照青山懷舊情深俯仰間老健我猶清福在携兒伴弟入鄉關

慶應丙寅國難去濱田于時萬甫四歲昭和戊辰五月再

來六十六歲慨然有作 掛冠後之作

雙親生地吾生地艸木水邱皆有情六十六年空一夢白頭重
入龜山城

信美江山眼底開歸人何事久低徊一丘一壑難看過曾入祖
先題咏來

春滿城墟草木深劫餘斷礎亦難尋子孫別有傳家寶千載不
磨忠愛心

昭和七年四月歸鄉携妻三美女道子婦慶子初夜逢雨
後晴 同上

繞簷點滴濕燈青歸客中宵夢易醒六十年前此春雨祖孫親
子一堂聽

吾妻吾女吾男婦百里提携到墓門奉謝先靈唯感淚一家全
福是遺恩

不爲兒孫買美田此心吾亦範前賢家山十畝須珍重曾自先
君遺愛來

昭和八年二月一日印刷
昭和八年二月五日發行

(非賣品)

名古屋市中區南鍛冶屋町三ノ二十五

編纂兼 發行 者 能 勢 萬


名古屋市中區大津町二丁目五番地

印刷者 小 林 代 次 郎

名古屋市中區大津町二丁目

印刷所 小 林 活 版 所

電話 東四八五九番



終